

16 JAN 1996

Keating-Mahathir

LAWATAN KEATING SELESAIKAN SEDIKIT FAHAM KECIL, KATA DR MAHATHIR

KUALA LUMPUR, 16 Jan (Bernama) -- Perdana Menteri Datuk Seri Dr Mahathir Mohamad hari ini berkata lawatan rasmi Perdana Menteri Australia Paul Keating ke Malaysia penting bagi membantu menyelesaikan sedikit salah faham dan masalah kurangnya pengertian terhadap satu sama lain.

Dr Mahathir berkata perbincangan mereka selama sejam berlangsung dalam suasana "seberapa harmoni yang mungkin."

Ketika menjawab pertanyaan wartawan Australia tentang bagaimana beliau menilai pentingnya jabat tangan antara mereka, Dr Mahathir berkata: "Saya tidak pernah mengkaji bagaimana hendak mengukur nilai sesuatu jabat tangan."

Ketika ditanya lagi sama ada Keating benar-benar datang ke sini untuk menemuinya dan berjabat tangan dengannya, beliau berkata: "Sudah tentu."

"Saya berjabat tangan dengan banyak orang dan kira-kira 10,000 orang pada masa perayaan. Saya berjabat tangan dengan semua orang dan dengan Keating sebagai pemimpin Australia," kata beliau selepas menerima akunjungan Keating di pejabatnya di Jabatan Perdana Menteri.

Keating tiba di sini semalam untuk lawatan rasmi tiga hari.

Dr Mahathir berkata pengertian yang beliau harapkan daripada Australia ialah tentang masalah Malaysia sebagai negara berbilang kaum yang mempunyai sensitiviti sendiri.

"Sebelum orang lain memberikan pendapatnya sekurang-kurangnya mereka hendaklah memahami keadaan yang kita hadapi.

"Kadang-kadang sebagai ahli politik kita melatah dan menyatakan sesuatu yang kita kesali kemudian," katanya.

Dr Mahathir berkata setiap negara mempunyai sistem nilai yang berbeza dengan negara lain dan Malaysia tidak fikir yang ia mempunyai hak untuk memberitahu orang lain tentang bagaimana hendak mengendalikan negara mereka.

Mengenai peranan Australia pada masa akan datang di Asia, Dr Mahathir berkata Australia mempunyai peranan untuk dilaksanakan dan bentuknya pada masa akan datang perlulah dirumuskan oleh Australia dan negara-negara Asia.

Sebelum itu kedua-dua Perdana Menteri itu telah menandatangani penandatanganan memorandum persefahaman mengenai pendidikan antara kedua-dua negara.

Ketua Setiausaha Kementerian Pendidikan Dr Johari Mat menandatangani memorandum itu bagi pihak Malaysia manakala Pesuruhjaya Tinggi Australia John Dauth mewakili negaranya.

MoU itu bertujuan menggalakkan pertukaran penuntut, program berkembar di kalangan universiti, biasiswa dan tempat bagi penuntut Malaysia di institusi pengajian tinggi Australia. -- BERNAMA